



Prins Fer I

Vreug of laat krieg
ich geliek,
mèt muziek
veul se dich riek!

5x11



2006

Jeugdprins Mitch
Jeugdprinses Jolien

Mèt 't racket óm ózze nek,
doon wae dees daag
good gek!





Proklamasie van prins Fer I



Ich, prins Fer I, 55° prins van CV De Moerebuuk, pakweg 40 jaor geleje gebore en later getoge in 't moeërelanj as jóngste zoon van Sjra vanne Bekker en Tien van Linje, 11 jaor getrouwdj mèt ein veurmalige jeugdprinses vanne Puinesjödders, genaamdj Angelique Didderen, vader van Ruud, Max en Eefje, woeëndj inne buurt Kunnekoel oppe Seringestraot, vanaaf noe Prinsestraot nr. 11, "directeur/eigenieër" van Fermate, van woeë-oet ich dirigent bèn bie fanfares en hermenieje, eige dialektleedjes maak, en van alles en nog get doon op muziekgebied, bienao 30 jaor lid vanne fanfaar, de lêste jaore jaomer genóg zónger muziek te make, óngevieër aeve lang actief veur de Èller vastelaovendj, ieeërst oppe bóntje aovendj, later veural inne muziek, dit jaor lid van 't jubileumcomité 5x11, in miene vrieje tied muzieklieëraar bie Stichting Kreato in Thoeër en 't college in Wieërt, ich gaon d'r gaer eine drinke óm den innegang get te aojhore, laot uch bie de gratie vanne raod van 11 't volgendje wete:



1. Ich wil eine prins zeen veur ederein: jónk, aod, erm, riek, groeët en klein.
2. As gae mèt mich, mien adjudante, jeugdprins Mitch en jeugdprinses Jolien ein bietje mèt wiltj laeve zulle wae ós veur 400% gaeve.
3. Op 12-11 begost 't jubileumjaor geweldjig, hevig en hieël snel. As gae neet kintj biehaoje, kiek den aaf en toe op www.moerebuuk.nl.
4. 'T duit deze prins en zien gevolg hieël veul deugt det de vastelaovendj in 't moeërelanj zoeë laeftj ónger de jeugd.
5. Oppe jubileum bóntje aovendj zal naeve ein noe geluid ouch aoje glorie herklinke. Wae moge dao mer leefst drie daag ein pótje beer bie drinke.
6. Ich staon dit jaor inne Kwakel dus dae geit neet door de brebebós.
7. Hóbtj gae ein centje euver mer zeetj gae nog neet euverstag, kouptj den asnog ein multimedibox en/of jubileumvlag.
8. De groeëtste optocht in 55 jaor liektj mich kei sjiek, mer den waal gaer mèt allein mer eige Èller vastelaovesmuziek.
9. Zelf altied as vastelaovesmuzikant vanne partie, hób ich as prins ouch gaer steeds livemuziek d'rbie.
10. Waat de café- of zaalhaojer ouch zeet, wae gaon neet heives veur de lêste live-noeët geklonke heet.
11. Waat ich dit jaor 't leefst euveral in 't moeërelanj opkalk, is de Orde vanne Noeëtebalk.

En det alles ónger mien motto:



**Vreug of laat krieg ich geliek,
mèt muziek veul se dich riek!**



Weurdje vanne Prins.



Leef moeërebuuk en moeërebuukskes, 11 Jaor geleje, waerdje ich op vastelaovesdinsdig vrie hel door ein lid van 't prinsecomité inné telefooncel geduudj, bie Tjeu inne café. Hae vroeg mich; "is det neet get veur dich veur volgentj jaor?" Hae euverveel mich en ich zag; "kom euver 11 jaor mer trók." Ich wist ouch sangerdaags nog good waat ich haaj gezagd mer teldje d'rop det hae det neet mieër wist. De jaore ginge veurbie en volges mich waerdje zoeëget hieël Èll (zelfs Siem) gevraagd om prins te waere, behalve ich. De vertwiefeling sloog toe, wille ze mich neet of zoje ze den toch.....?? Tot 2 jaor geleje, midde inne café bie Marlies, op vastelaovesmaondjig ein lid van 't prinsecomité naeve mich kwoom zitte. Hae vroeg; "as se dich zoje vraoge óm jubileumprins te waere, zoot se det den doon?" Ich antwoordje "as gae in mich de jubileumprins zeetj bèn ich d'r klaor veur". Weer huërdje ich ein dik jaor niks totdet mèt Paose emes ane deur sting mèt gekleurdje eier dae vroeg of ich d'r nog steeds klaor veur waas, zoeë jao, den noom met Èll-kèrmis emes còntact op. 's Zaoterdigs mèt de kèrmis sting d'r tenslotte emes ane deur dae formeel de vraog steldje die eigelik allang beantwoordj waas "wils dich de 55° prins van De Moerebuuk waere". Dao hoofdje ich neet euver nao te dinke en zag; "jao". Toen kwoom de geweldjige veurbereidingstied woeëbie ich 't meist genote hób van alle hints en opmerkinge van allerlei moeërebuuk die waal dachte te wete weem det prins zoj waere. Same mèt de adjudante en prinsecomité hóbbe wae al hieël get aafgelache. 'T sjoëenste waas det ich as lid van 't jubileumcomité hieël kort bie 't veur zaat en in praktisch eder vergadering waal ein vraog hób gesteldj woeë ich as jubileumprins allang 't antwoord op wist. Spannendj waas 't sjrieve van ein bericht in 't gasteboek vanne website vanne moeërebuuk. Kiektj zelf mer wannieër en waat det waas!! Eindelijk is 8 januari gewaestj. Ich staon den waal get dèkker inne spotlights, mer prins zeen van De Moerebuuk is get woeë ich al van droum sinds ich as 11 jaorig menke veur 't ieeërst mètdeej ane bóntje aovendj. Ich bèn d'r gruëts op det ich dit jaor prins maag zeen en ich wins uch allemaol eine óngeëvenaardj sjoëene vastelaovendj.


Óm mèt muziekterme te spraeke is de vastelaovendj van aafgeloupe jaor veur mich ein soort "opmaat" veur dit jubileumjaor. Veur Prins Theo I, prinses Jeanne, jeugdprins Tim en jeugdprinses Judith waas 't nateurlijk de hoofdmelodie, en die hóbbe zoeë good vormgegaeve det ze nog jaore wie muziek inne oeëre vanne moeërebuuk zal naoklinke, herstikke bedanktj daoveur. Veur ein good muziekstök is ein gooj opmaat neet te misse. Ich hoop det die melodie dit jaor maag oetgruje tot ein geweldjige compositie.



Eine lever.

Evert ging veurig jaor nao Wieërt mèt ziene kever. Hae dacht; "ich parkeer det dink bie Gruythuysen achteróm ane Beekstraat, dao is 't veur niks". Zoëë gedachtj, zoëë gedaon, en hae ging de stad in.

'T winkele leep get oet en woëërom is neet belangriek veur dit verhaol. Mer feit is det t'r nao 6 oor bie Gruythuysen trök kwaam en det die minse de port geslote haje. Evert kost dus neet mieër bie ziene auto en is hum sangerdaags mer op gaon hole.



Bès se mich vergaete baas?

Wisj dier al ...

- det bie Hanneke en Berend 1 spoeëk en 1 moeër veur de roet hingtj mèt die daag
- det det mót kinne ouch al vinje sómmige van neet
- det Jo vanne Kaolder Hein van Seunis as noewe buurman kriegtj
- det Jo drek de gezèt opgezagdj heet wie d'r 't huërdje
- det Els van Lemme eine kieër tiejes 't wanjele tege die anger reep det ze ein rieë zaag loupe
- det die anger zagte "Els, det is eine haas ..."
- det ze ein stökske verderop tege Els repe det dao ein rieë leep
- det det nateurlik ouch gewuën eine haas waas
- det Els oppe door neet tegooj waerdje van det gemisselik
- det 't college vanne gemeindje Hunsel te vergelieke is mèt meinige vrouw
- det wiltj zègge 'blondj en ein gaat inne handj'
- det Pietje van Nol hieël good kan slaope
- det 't hum niks oetmeuktj as se naeve hum zitte te kruse
- det Nol en letje nog steeds de zaal doon
- det ze d'r ouch nog steeds mèt aan 't oetsjeie zeen



Woeë bemeeje ze zich mèt?



Ein vreemdj veuwerp.

Alle seniore hōbbe in december vlak veur de Sinterklaos ein presentje gekrege namens heur vereiniging. Wie ze 't oetpaktje waas 't neet drek veur ederein dudelik waat det dink noe eigelik waas. De eine meindje det 't eine aanstaeker waas, de angere meindje det 't al kepot waas gegange inne verpakking. 'T heel meinig gesprek op gang want ein cadeau kriegte en neet weite waat des se d'r mèt kinst doon, det is niks óm seniore mèt op te sjepe. Mer 't bleek eine opener, toch nog get woeëdet se get mèt kinst doon ... gelökkig mer!

Waat ein vraog!

Jac Teuwen, de mins van Hella, duit eder jaor mèt ane optocht. In 2005 ging d'r verklèdj as 'Lord of the (st)Rings'. Det waas nateurlik good gevónje en hie en dao vroege de minse langs de kantj wiedet t'r toch aan zoeëveul strings kwaam. Jac keek den hieël neuchter en zagt gewuën "oet mien bureaulaaj."



Neet te verstaon.

Jesper haaj van 't internet eine film gedownloadj: "Ocean's twelve". Toen chips en kretjes beer gehooldj en alle vrinj en bekindje oetgenuëdj. Ederein ging klaorzitte veur eine gezellige filmmiddig dus mer gauw det dink aangezatte. Mer waat bleek ... dae film waas Spaanstalig!



advertentie

Veur appele en paere
Gaotj nao Kippen-Moors




vers vanne boum



Veur good
tummerwerk meuktj
Koos Winkelmolen
zich sterk

Höbtj gae
kabelwerk ?

van Geleuken
is den sterk



Bot gevange

Eine collectant beltj aan en Emiel duit ope. Zeet dae collectant tege Emiel; "Ich kóm veur 't gehandicapte kindj." Woeë-op Emiel antjwoordj; "Den mót ich uch teleurstèlle, ós Richard is neet toes."



Ein mupke.

'T versjil tösse mood en lef hōbbe.

'Mood' is midde inne nacht bezope thoeskómme, dien vrouw steit op dich te wachte mèt de bezem en den vraoge; "Bès se noch aan 't poetse of vluug se nog örges haer?"

'Lef' hōbbe is midde inne nacht bezope thoeskómme en mèt ein parfumlocht óm dich haer en luppestift op dien kleijer dien vrouw op heur kóntj houwe en zègge; "dich bèst de volgendje!"





advertentie

Gaotj d'r ins get dèkker op oet
Beveurbieëldj nao
De Prairie
ofwaal
Bie Paul en Marlies

**KEPPER**

Clown
Goocheliëer
Artiest
Fratsemaker
En nog völ mieër

**RECHS****Döbbele
pech.**

'T waas örges begin
september en Philma
ging 's aoves nao Els
van Bair Geelen om

dao get gaon te knutsele en pöppe
make. 'T waas wie normaal weer erg
gezellig, mer mèt 't heives gaon
sloog 't noeëdlot toe. Wie ze boete
kwaam en euver de stoep leep
vertrooj ze zich, stapdje naeve de
stoepbandj en veel op heur gezicht
mèt 't gevolg det ze heure erm
gebroke haaj. Det doordje nateurlik
'ne hieële tied veur det dae erm weer
gezóndj waas mer oeteindelik waas
de pien geleje en kost 't laeve weer
verder goan. Inne herfstverkansie
waerdje beslote óm d'r mer ins 'n
paar daag op oet te trèkke. Ze ginge
nao 't zuie óm te gaon wanjele. Op
eine mörge, ze wore al 'n tiedje
óngeweges, sloog 't noeëdlot weer
toe. Philma waas bezig mèt 'ne
stevige klum toen ze opins oetsjoot
en op heur gezicht veel. Mer waat
erger waas, ze brook daobie dae
angere erm! Ouch deze móst weer
inne gips en ouch noe weer waas 't 'n
aantal waeke revalidere gebloaze.
Philma, wae vanne redaksie hope
toch echt det as se mèt de
vastelaovendj op stap geist good
opletst mèt dich te vertraeje.
Of mesjien is 't waal

LINKS

verstenjig det
diene mins Ton
dich mèt de
kruker heives
veurtj.

**Portemene vergaete.**

Bair en Marie van Knapen wore nao de senioremiddig gegange.
Wie ze ein drenkske woeëje bestèlle kwaam Bair d'r achter det t'r
gein portemenee bie zich haaj. Marie kreeg nateurlik de sjöldj
want die haaj det dink neet oet zien aoj bóks gehoordj en in
zien zuver bóks gedaon. Noe geit de kal rón dj det ze
toen bewustj zoëë goodkoop gedaon höbbe want tweeë
daag later haje ze Gouwe Broeloft. 'T waas dus neet
zoëë vreemdj det ze zónger portemenee op stap ginge
dinke sómmige. Waat meuktj 't oet ... taktiek geslaagdj
want ze höbbe ein baeregoud fieëst gatj!

**Roeëj streep**

Zij Aktief ging d'r weer ins eine daag op oet, zelfs Riet van Dijk ging mèt. "Mer
waat heet Riet toch ein roeëj streep in heure nek?," vroke die anger zich d'n
hieële tied aaf. Totdet emes de mood haaj óm 't heur mer ins te vraoge. "Ich
waas mich aan 't jage óm de bös te hole en toen zaag ich det miene kraag nog
neet gestreke waas. Dus ich det in mien haost mer gauw gestreke wie ich
miene jas nog aan haaj. En doe reudst 't al, toen kwaam ich mèt 't striekiezer
aan mien vel!"

Woeë höbbe wae det dèkker gehuërdj ... 'Haastige spoed ...'

**Siem 50 jaor.**


12 November is Siem vanne Koalder 50
jaor gewore. Hae heet good oetgepaktj:
óm 10 oor 's mörges begos 't fieëst al. De
hieële daag waas t'r muziek, lekkere
hapjes en 's aoves ein lekker buffet. De
Koalderbend kwaam ein serenade bringe
en höbbe hum oetgerope tot
besjermhieër van heure bend. 'T waas
allein neet hieëlemaal dudelik weem noe
weem móst besjerme. Siem de bend of de
bend Siem?? As speciale gast kwaam
Pierre Knoop Siem ouch nog ein bietje
veur de gek haoje. Van vrinj oet Swame
kreeg Siem ein T-shirt mèt ane veurkantj
gesjreve Siem 50 jaor, ane achterkantj
stóng "En det is geine Koalder". Det haaj
oet Èll zich nemes kinne bedinke.



advertentie

STERK IN STAOL**DERCKX STAOLBOUW**

Inne kasse van Coolen
kin djer kómkómmers hole

**Ein mupke.**

Oma ging nao de kapper, net as
eder waek waas 't tied óm de haor
get in 't fatsoen te bringe. Noe trof
ze net dae kieër det ze get haost
haaj ein kapster die d'r flink op los
zeiverdje. Op ein gegaeve moment
zeet die kapster tege oma; "oma,
eur haor weurdj al get gries ..."
Oma greep heur kans en
antwoordje; "den sjeet mer ins get
op maedje!"



zeivermóts



advertentie

Veur vrachtwages die ein noew
gezicht wille höbbe



truck color design

BOEFIE

Dé specialist
in kinjerkleier



Laevendje wèklers

Gebeurtj tiejes 't JWE-kamp. De jónges van Sé van Miet, Luuk en Noud, ginge ouch mèt nao 't JWE-kamp. Noud vroeg aan Luuk (dae haaj al get kampervaring) "mót ich ouch eine wèkker mèt numme?" "Nae, nae," zagt Luuk, "op 't kamp hóbbe ze van die loupendje wèklers. Die vertèlle dich precies wie laat 't is óm 4 oor snachs!"



Get vergaete.



José van Arjen van Vlerken heel ein 'Tupperware kookstudio (!)', Gae kintj uch dao waal get bie veurstèlle. In zón geval zörgtj de gastvrouw veur de ingrediënte en det d'n aanrèk zuver is. José is zelf kok, mer heet daoboete ouch nog veul ane kop. Zoeëveul det ze, óndanks det ze bie Ruud en Marleen werktj, toch nog 't vleis vergitj te koupe veur heur gaste. Ze haaj nog geprobeertj óm Arjen nog gauw nao de slechter te steure, mer dae trapdje dao neet in. Det waas dus bale det ze as kok zeendje toch nog hamlepkes oet de diepvries mót hole

Brrr .. wea zeen vers oet de diepvries!



Wiezoeë sjule?

Marij zaag ins eine kieër op maondjigmörge det Jo get aan 't zeuke waas inne gezèt. "Waat bès tich aan 't doon?", vreugtj ze aan Jo. "Ich bèn aan 't zeuke waat 't ieerste heet gemaaktj gister," zeet Jo. "Jao mer, dich bèst toch gewaestj kieke!?" zeet Marij. "Det kloptj," zagt Jo, "mer ich móst sjule veur de rengel!"

Dae 't geluiftj maag de handj opstaeke ...

1 - 0 ?



Ein bezeuk

Nel van Hen van Steven waas ein puéske get slechter t'r bein. Thea van Peter van Heber ging heur ins eine kieër opzeuke. Ze waas al dèkker bie Nel gewaestj en parkeerdje de auto zoeë-as altied langs heur hoes. Inne gang kumtj Nel oet ein anger hoes nao boete en zeet "Thea, ich woeën al jaore in dit hoes!" Nog eine kieër op bezeuk gaon en Thea wètj ouch welke oprit de gooj is.



advertentie

Mót eure auto weer fit door alle waer?



Gaotj nao Garage Heemels haer.

advertentie

LAST VANNE VEUT ?



Den snel nao pedicure Bep van Oosterhout-Tobben

advertentie

Sjoeënhedsspecialiste

Mariet van Enclavort-Janssen


As gae der nog knapper oet wiltj zeen.




Moeëre en Moeërinne.

Trökkiekendj op 't aafgeloupe jaor mót ich constatare det tied ein erg relatief begrip is. 'T geit allemaol veul te snel en is te gauw aafgeloupe. Det kumtj nateurlik door 't feit det prinses Jeanne en ich eine hieële sjoeëne tied hóbbe gatj. Alles rónjdóm de vastelaovendj heet ós óntzettendj geboeijdj. Wae hóbbe mèt aod en jónk fieëst geveerdj. Veural de gezelligheid en de hertelikeit hóbbe ós hieël good gedaon en bie alles ein hieël good geveul gegaeve. Dèk weurdj door aod-prinse gezagd; "Prins zeen, det mós se mètgemaaktj hóbbe." Ich begriep noe precies waat dao mèt bedoeltj weurdj. Prinses Jeanne en ich hóbbe moge geniete van ein aantal ónvergaetelike gebeurtenisse. Opvallendj veur ós is det de jeugd zoeë good bezig is. De toekomst vanne vastelaovendj in Èll zuut d'r erg good oet. Ze zeen creatief, actief, muzikaal en veural ouch sportief. Det beloofdj nog hieël veul goods veur 't kómmendj jubileumjaor. Euveriges is det al gebleke oppe fieëstaovendj / leedjesaovendj in november 2005 toen 't jubileumseizoen waerdje geopendj. Weem dao bie waas wètj precies waat ich bedoel. Wae, prinses Jeanne en ich, wille van dees gelegenheid gebroek make óm inkele minse te bedanke. Uiteraard op de ieerste plaats miene adjudant en broor Leon. Hae heet same mèt Anneke d'r aan biegedrage det alles zoeë good en soepel verleep. Mèt name wille wae nateurlik ouch de minse van 't prinsecomitè bedanke. Steurdj die veural neet drek wèg as det die ane deur kómme. Dao krieg djer volges mich later spiet van. Uiteraard bedanke wae ouch vorst Jan en de hieële raad mèt aanhang. 'T waas ós al snel dudelik det die heur zaakjes aardig op orde haje en det alles prima georganiseerdj waas. 'T prinsepaar 2005 winstj de 55 ste Prins vanne Moerebuuk enorm veul succes tiejes 't kómmendj jubileumjaor. Nogmaals allemaol hieël erg bedanktj. Alaaf !

Prins Theo I en prinses Jeanne





Communicatie



KVV en de aojerraod vanne lieëgersjoeël ginge dit jaor veur 't ieërst same Sintemerte organisere. Óm alles good te laote verloupe moke ze gooj aafspraake. De aojerraod zoog in 't kóntaktblaad sjrievet det de kinjer vanaaf 't sjoëelplein nao de sintemertehoup ginge. De kinjer kreges ouch nog eine breef mèt zoeëdet de aojers good oppe huëgdje wore. Tot groeëte verbazing van de leje vanne aojerraod haaj 't KVV in 't kóntaktblaad gezatte det t'r vertrokke zoog waere vanaaf 't plein bie de kirk. Op 26 november steit alles veur de zekerheid nog mer ins in 't kóntaktblaad t'rwiel de houp allang is opgebrandj.



Fuitje.

Mariëlle Beurskens haaj 't wasmesjen 's morges volgestoptj en waas nao 't werk gegange. Jantje waas dae daag oppe tied thoes en dacht; "ich zal Mariëlle ins verrasse", en ging de was oppe draod hange. Zoeë gedachtj, zoeë gedaon. Toen Mariëlle thoes kwaam waas 't tied; "Jan waat hób se noe gedaon? Dae was is nog neet gewasse!"



Good ónthaoje.

Sjeng vanne Bekker beldje op ein gegaeve moment Piet van Glabbeek op. "Piet, bie Anke en Roger is ein kientje gebore .. eine zoon!" En Piet vreugtj natuerlik welke naam ze dae zoon hóbbe gegaeve. Toen zeet Sjeng; "Det kan ich good ónthaoje, de hóndj bie Marlies dae hètj 'Jor', en dit kientje ziene naam is 'Jorre' !"

Ein vräogsle :



Waat veur blome zeen dit?

- A Neet te zègge, mer waal goje.
- B Verhaagse vioeële.
- C Zwart-witte en hieël groeëte.
- D Good verzörgdj en zónger luus.




advertentie



'T is allemaol goud
waat t'r blinktj bie

Gold Corner
Juwelen



Kriegtj gae ónverwachs;
bezoek oet allerlei heuk?

Lemmenhof

kampere en logere,
bringtj oetkómst:

Al vreug oppe kleintjes lètte.



Geert van Jo vanne Sjilder en Yvette van Carolien van Knapen ginge op verkansie. 's Zunjes 's morges, bepaktj en bezaktj, ging 't haer richting Noordwijk. Net wèg, ze wore al bienao in Wieërt, dreidje ze zich alweer óm. Trök aan thoes rendje Geert nao binne en reep; "mam, mam, woeë ligge de postzegels veur as wae dich ein kaart wille steure ...!"



Ein muple.

Ein vrouw bekijktj heur naakse lief inne spiegel en zeet tege heure mins; "Ich bèn dik, lieëlik en veul mich slecht. Ich hób dringendj ein còmpliment nuëdig." Dae mins kiekij heur ins aan en zeet toen; "Dien ouge zeen toch nog good!"



advertentie



Ein sjoëen sjilderieke veur
uchzelf of emes anges

Gaotj ins langs bie
Peter Hermans

KUNSTSJILDER



Is t'r get neet in orde met
eur kat of eure hóndj
Snel nao de dierenkliniek
want dao make ze die
weer gezóndj



Hoeëge noeëd.

Truus van Vin Lei haaj get aan 't bein. Toch woeëj ze gaon stappe kwaam ze mèt de vastelaovendj bie café De Prairie. Van al det drinke môst se oppe door nao de wc, niks gek's nateurlik. Mer ómdet ze op krukke leep en 't bie Marlies oppe noew wc's erg krap is ging ze ane bar de sleutel vanne rolstoel-wc mer vraoge! Dae op det moment bardeenst haaj heel de poeët stief dèt Truus mer oppe gewuën wc môst gaon. Wie det noe aafgeloupe is wete wae neet, mer Truus zal toch waal örges gepistj hóbbe.



Gein water.

Oppe Antoniusstraat waas de stoep opegebroke en 't waas bekintj det t'r eine bepaoldje tied gein water zooj zeen. Lenie van Orbon waas zich de haor aan 't wasse, want ze môst nao Rooy hêr. Mer, gae raodj 't al, toen kwaam in eine kieër gein water mieër oet de kraan. Waat noe gedaon? Mer good det ich nog ein fles spa-roeëd hób staon, den kan ich dao de haor mèt



oetspeule.

dröp, dröp, dröp, ...



advertentie

Veur appele en paere
Gaotj nao Moors-fanssen



vers vanne boum

SPAR - Leon Derksen

Veur alle
dagelikse
boeëdsjappe




?



Sjoeën geldj.


J. Beurskens haaj de 1° pries gewónne inne RKESV-lotto. En det geit neet óm ein paar kwartjes! Mer weem is noe J. ?? Jo? Jur? Jan? Jimmy? José? Volgendje kieër mót Jeroen mer ieerst de nummerkes controlere veurdet t'r de pries euver meuktj oppe bank.



Jan heet 't al op en José wachtj nog steeds op heur (kèrmis-)cente ...

advertentie

Zitj gae met de henj inne haor ?



Gaotj den nao SCISSORS & CO

Höbtj gae geine
taleknóbbel



Custers
Taaladviezen
heet dae waal



Ein mupke.

Op eine goje daag leep Gaston euver de mertj in Turnhout toen hae in eine kieër ziene vrendj Camile zaag riej in eine jeep, zoeë good as noew. Mer hae herkindje dae jeep, dae waas van ein vrouwelikke kinnis van allebei, van Lieve. Camile stopdje bie Gaston en lachdje van oeër tot oeër. "Allee, Camile, hoe komt gij aan die jeep?" "Awel, die heeft Lieve aan mij gegaeve," zegt Camile. "Aan u gegaeve?? Ik weet dat ze u gaere ziet, maar 'ne nieuwe jeep, da's toch wel straf!" "Awel Gaston, laat me u vertellen hoe dat komt. We reden samen in de jeep ergens op 'ne zandweg in Nergenshuizen. Plotsklaps zet Lieve de jeep in de 4-wiel-aandrijving en sjeest de bossen in. Ze parkeerde de jeep, stapte uit, deed al haar kleren uit en zei: "Camile, neemt wat ge wilt", en dus nam ik de jeep ..." Toen zegt Gaston; "Camile, verdulleme, ge zijt 'ne slimme vent. Die kleren hadden u toch nooit gepast ...!"

Gezègdje:

Eine ezel stuëtj zich gein 2 kieër ane zelfdje stein.

Mart van Stiene ging nao kapper Jos in Wieërt. Mèt ein net köpke ging d'r weer heives en nog hieëlemaol gruëts vergaet t'r ziene gordel óm te doon. Jaowaal, de deners vanne wèt stonge hum al op te wachte en Martje kreeg ein bón. Nao ein waek of 6 waas 't weer tied óm kapper Jos te bezeuke. Dae mook dao weer get sjoeëns van en Mart ging vlot heives. Waat dinktj gae? Juust! Weer ein bekeuring, op dezelfdje plek en veur dezelfdje gordel! Wae zeen noe de waeke aan 't aaftèlle óm te kieke of det gezègdje nog waal kloptj ...

ia ... ia ... ia



Bekeuring menieër,
gae zeetj eure reem
vergaete.

Woeë is de geldjlaaj.

Henri helptj altied mèt, mèt ELL-NIÑO. Wie ze alles opperuudj haje misjde ze de geldjlaaj. Neet 't geldj, mer de laaj waas kwiet. Henri dacht det de laaj inne bónnewage waas blieve ligge en dae wage sting al bie Hohenwald. Dus Henri ging kieke in Kelp. Wie hae de wage binnekwaam zoog t'r de laaj al staon. Mer wie det t'r de wage in ging óm die laaj te pakke kieptj det dink in eine kieër op. Henri toemeldje achteroet veel nao de achterkantj vanne wage. "Noe kiek mich hie," dacht hae bie zien eige, "mer good det 't nemes gezeen heet." Waal fijn des se 't effe hóbste wille vertèlle Henri!





Parkere.

De leiding van groep 1 en 2 van 't K.V.W. ging oet aete bie de griek in Wieërt. Marjon parkeerdje de auto inne parkieërgraasj vanne Walburg. Ze haaj de hieële aovendj neet gedronke want ze móst nog rieje. Toen ze nao 't aete de auto woeëje hole waas de parkieërgraasj toe. Bastiaan, Henry, Bram en Tim probeerdje de port ope te braeke, mèr det lökdje neet. Wie ze thoes zeen gekómme weite wae neet, mèr de auto höbbe ze sangerdaags opgehoojdj.



Waat doon dees minse?

- A Ze zeuke nao ein hangplek.
- B Die lache emes oet.
- C Die teste ein noew böshaltje
- D 'T is neet te zègge woeë ze noe weer lol aan höbbe.

Effe oplètte ; 't 36-lètterig alfabet op
BS De Verrekijker.

Net veur de kèrmisdaag waas de inspectie op bezoek bie ós basissjoeël . Dao waerdje geadviseerdj, wegès 't groeëte aantal kleuters en de nog te verwachte instruimerkes, óm in plaats van de 2 kleuterklasse van allewiel euver te gaon nao 3. Op eine aovendj waerdje de aojers hie-euver geïnformeerdj en innegang waerdje gevraagd of 'r vriewilligers wore die 9 lètterkestjes opnoew koste vèrve. In eder van de 3 kleuterklasse móste 3 alfabetkestjes kómme. Ein kestje heet 9 laetjes en eder laetje heet zien eige lètter van 't alfabet dus mèt 3 maal 9 is 27 laetjes höbs se zelfs nog ein euver. In totaal dus minstes nuëdig; 3 klaslokale maal 3 kestjes is 9 kestjes is 81 laetjes!

Dao wore 2 moders die op kèrmismaondjig ane slaag ginge en al gauw kwome ze d'r achter det 'r mer 8 kestjes inne graasj stonge te druëge in plaats van 9. Gezocht en gezocht, mer det 9^e kestje waas nörges te vinje, 't móst dus nog op sjoëel zeen. De volgendje daag ging ein van die moders mèt 't hieële verhaol nao de juf en same mèt angere ginge ze aan't zeuke aan nao det 9^e kestje. 'T Waas nörges te vinje, wie kan det toch vroege ze zich allemaol helop aaf ??? In eine kieër waerdje alle kleuterjuffe roeëd tot achter de oeëre ... ze kwome d'r veur de 2^e kieër achter det ze zich vergistj haje. Waat bleek? Toen ze die kestjes ginge koupe wore d'r 2 kleuterklasse, nog gein 3. Dus wore op det moment 8 kestjes mieër as genógtj (vergissing 1, 6 kestjes waas genógtj gewaestj). Mer as se den 4 kestjes p'r kleuterklas tëlst, maal 9 laetjes, den kum se tot de bekindje 36 lètters van 't alfabet! (vergissing 2, want zoeë-as ederein wètj heet ein alfabet 26 lètters ...).



Ein muple.



Neet óm te lache.

- eine cursus lasse dae aafgelastj is
- gehechtj zeen aan ein litteiken
- ein fotorólke nao ein ontwikkelingslandj steure
- eine glazewasser dae leierzaat is
- emes mèt vaatzeedje laote aafwasse
- eine vanne gemeindje mèt ein lui oug

Kinjer

'T einigste versjil tösse de twieëling Ruud en Max van Fer en Angelique is det Max ein maot groeëter heet inne sjoon. Tegewoordig gaon ze al get voetballe en óm de leiders ein bietje te helpe trèkke ze die jónges versjillendje kleier aan nao 't traine, Ruud in 't roeëd en Max in 't blauw. Ouch wie ze mèt deje aan ein toernooj haje ze versjillende kleure zök aan (mer nateurlik waal 't zelfdje shirtje). Veur de eige leiders waas 't dus nog steeds gein probleem ze oetein te kinne.

Mer wie Erwin Compeer (leider van ein anger team) aan Max vroog "ben jij nou Ruud of ben je Max?", toen zeet Max; "jeh, zuus se det neet, ich bèn Max, ich höb ein groeëter maot inne voetbalsjoon!".



advertentie

EINE
KAMPIOEN


De mik, de bruedjes, de vlaai,
alles is dao zoeë lekker

Nateurlik bie Thijs,
ózze werme bekker



gite

Wiltj gae
noew tegelkes
ane moor? En gae
kintj det zelf neet doon?



Den nao Peter v.d. Eertwegh.

Veur al eur loeënwerk,
snel, good en neet deur



Dao höbbe wae Harrie v/d Looy toch veur

LAST VANNE VEUT ?

Den snel
nao pedicure



Hennie
Heijkers



Kinjer.

Guus weurdj thoes netjes opgeveudj. Op ein gegaewe moment zeet t'r tege opa; "tege pap en mam maag ich 'dich' zègge. Mer tege dich mó't ich 'uch' zègge !"




Sjoeën haor.

Mariëlle kwaam get later nao de vergadering van JWE ómdet de kapper dao waas. Wie ze binne kwaam zag't nemes get van heur kapsel. "Potverdorie" dacht Mariëlle, "hób ich 30 kilo haor d'r van aaf en nemes dae 't zuut".



Is deze pestoeër ...

- A ein sjeetgebèdje aan 't doon veur ós gemeindje?
- B aan 't sollicitere in Tungelder?
- C aan 't pleite veur baetere wien inne kirk?
- D de vastelaovesmès veur aan 't gaon?



advertentie



Wiltj gae ál ouch ins op los drumme? Veur slaagwerkmuziek nao

ELCEE - ðon Camp

Mèt eine caravan droet; waer of gein waer? Den mó'tj gae nao Lantinga haer.



Ouch veur eine camper

VAKLAN

Boumkekerie Moors



Ouch veur eine kómplieëte tuinaanplantj.



Sjoeënheidsspecialiste

Jeanne v/d Hagen

As gae der nog knapper oet wiltj zeen.

advertentie

Gaotj nao Eerens of Profmarkt.nl




Dae levertj hang en sloetwerk en veul mieër artikele, goodkoup en snel!



Pinne.

Lianne ging pinne op 't plein want ze woeëj bie Siem ein runtje doon. Tim ging mè't heur mè't en kótsdje óngertösse eine goje flater op 't plein. Hae vaegdje ziene móndj aaf mè't ein gezèt die op 't plein laag. Wie ze trök kwome bie Siem haje ze allebei eine zwarte móndj.



Waat hèltj deze mins bezig?

- A Hae is van zien ieëste lintje aan 't geniete.
- B Hae is van zien tweekde lintje aan 't geniete.
- C Hae speultj tonieël (as t'r tied heet).
- D Hae slieëptj echt want hae heet net de geite binne gedaon.



Weurdje vanne vorst

Moeërebuuk,

Wae zitte in 2006: in mieërdere opzichte ein belangriek jaor veur ós vastelaovesvereniging en veur ós dörp. 'T jubileumjaor 5 x 11 jaor Moerebuuk is ingezatte en zal met spetterendje activiteite opgeloesterd waere. Ós jubileumcomité heet t'r ein jaor lang flink aan gerete en gae zultj allemaol merke det wae 't in Ëll tegooj aanpakke. Ich hoop det gae allemaol met veul enthousiasme met zóltj doon en det gae zelf enorm plezeer zóltj hóbbe aan ózze vastelaovendj 2006.

Mer waat ich veur de toekomst belangrieker vinj, is det wae inne organisatie van ózze vastelaovendj op dit moment minse hóbbe zitte met allerlei talente. Eine óntieglieke groeëte houp minse zètj zich - eder mèt zien eige meugelikhede - veur 200% in óm ós vereniging te steune, óm ós vastelaovesactiviteite te laote slage. Kiektj ins weem mèt heet gedaon ane ónvergaetelike leedjesaovendj op 12 november! Jónk en aod, man of vrouw, groeët of klein, dik of dun, allemaol zeen wae bezig met ózze Ëller vastelaovendj. Ederein alvast bedanktj hievueur en ich wins euch van herte eine goje vastelaovendj 2006!



Vorst Jan

advertentie

HENDRIKX-VAN GEMERT



BESTRAOTINGE

OASIS Mija bok

Kado nuëdig?



Veur as gae emes anges of uchzelf wiltj verrasse


Effe get euver de Kwakel.


Dit vastelaovesseizoen veertj CV de Moerebuuk heur 55 jaorig bestaon en staon wae ane veuraovendj van de 33-ste Bóntje Aovendj. Mer wie zitj det noe mèt de Kwakel? De aandachtige laezer zal gezeen hóbbe det wae veurig jaor "Jaorgank 53" bove ane bladzij haje staon. Dit jaor is det "Jaorgank 41" in plaats van "54" en zóltj gae uch terecht aafvraoge; "waat gaon wae noe kriege?" Ein paar minse zeen op óngerzeuk gegange, hóbbe alle Kwakels trök kinne vinje (woeëvueur dank aan diverse minse) en hóbbe ins alles op ein rieke gezatte.

In 't begin.

In 1963 heet ein groepke minse de allerieërste Kwakel gemaaktj. Teminste ... 't ieërste camavalsblaedje mèt de naam "Kwakel" want daoveur en tössetieds zeen anger blaedjes gemaaktj. Hie-euver later mieër. Waarsjienlik daezelfdje groep minse is 5 jaor lang aktief gewaestj. 'T soort pepeer verangerdje waal ins en in 1967 waerdje de Kwakel zelfs inne vorm van ein gezèt oetgebrachtj. Mer toen waerdje 't in eine kieër stil

Noewe start.

Nao 3 jaor, in 1971, waerdje (gelökkig) de draod weer opgepaktj. De Kwakel is van det moment aaf ónaafgebroke eder

jaar oetgebracht. Dae enthousiaste groep minse dae toentertied de draod heet opgepaktj is lang achterein bezig gewaestj. Det is te zeen ane meneer wie de Kwakel steeds waas samegesteldj. In 1971 steit oppe veurpagina "Jaorgank 27" terwiel det op dae van 1967 nog (de goje) "Jaorgank 5" steit?! Vreemdj, mer waorsjienlik is men toen p'r óngelök mèt de jaorgange vanne carnavalvereniging verder gaon tèle, den kloptj 't namelik precies. Tot en mèt veurig jaor is die lien braaf doorgetrokke en noe-det wae d'r ins good nao kieke hóbbe wae dit fuitje óndèktj.

Anger vastelaovesblaedjes.

Veur det de ieërste Kwakel oetgebrachtj waerdje zeen in 1953 en 1954 al ins twee blaedjes versjene ónger de naam "De Moeëreboek". Wae weite neet of in de tösseggendje jaore 1955 tot en mèt 1962 ouch camavalsblaedjes zeen versjene. As nog emes ein heet ligge oet die jaore den laot 't de redaktie astebleeftj wete. Later, inne jaore det al eder jaor eine Kwakel versjeen, is daobie sóms nog ein anger blaedje ónger eine angere naam versjene. Det wore in 1974 "Trammelant" en in 1978 "Moërezeiver. 'T is neet hieëlemaol dudelik woeëróm dit gedaon waerdje. In 1985 is nog 't extra blaedje "Jubileum-oetgave" versjene vanwege 't 33-jaorig jubileum van ós vastelaovesvereniging.

Tot slot.

Gae laestj dus noe de 41e Kwakel, nog 3 te gaon veur ein jubileumoetgave! En hie-aan wille wae vasthaoje tot 't tegedeil beweze is. Zoeë zeen wae noe ouch alweer: wae wirke d'r aan tot 't good is!


Stökske van bladzij 3 oet De Kwakel van 1971.

Noe de karnavalsgezèt "De Kwakel" 3 jaor gesjitterd heet door safwezigheid, bin ich bie dèt dit jaor weer ei aantal rasechte

De "kop" vanne allerieërste vastelaovesgezèt in 1952.



advertentie



mook
motoróngerdeile

advertentie

Gaotj d'r ins get dèkker op oet Beveurbieëldj nao De Bachelorclub ofwaal Bie Siem



advertentie

LAST VANNE VEUT ?

Den snel nao pedicure Toos Mennen




advertentie

Praktijk veur
Klassieke Homeopathie
bie Dianne Lamers



As gae op ein anger
meneer gezóndj wiltj waere


SLAGERIJ RUUD EN
MARLEEN HEIJKERS



Vers vleis
Kantj-en-klaor gerechte
Barbecues
En nog veul mieër


Hoe laat den?

Lowie de Belsj waas genuëdj óm bie Martha en Jac Triepels te gaon aete. Toen Lowie dao binne kwaam zeet Martha, "Waat bès se vreug jóng? Hób se hónger? 'T is pas half 11!" "Nae," zeet Lowie "t is al half 1!" Gae raadj 't al, net det weekend waas de klok verzatte en Martha haaj det dink trök gezatte inne plaats van vroet. 'T aete zal oeteindelik toch waal gesmaaktj



Nemes gezeen ...

Henri van Loes en Sjaak haaj gezeen det 'r ein verkieërdje óngerbóks bie zich haaj wie d'r nao 't voetballe thoes kwaam en de was oetpaktje. Hae dacht det die óngerbóks van ein van die anger manne oet zien team waas en zag det tege mam. "Laot mich ins kieke," zeet Loes. "Mer jóng, waat höbs tich gedaon?" zag Loes, "die óngerbóks is van mich!"



advertentie



Gein gèldj mieër
inne tes mèt dees daag.
Loup den mer bie
de Rabobank nao binne.
Want dao kins se
daag en nacht pinne.

CV De Moerebuuk - Programma Vastelaovendj 2006

(Sjriefftj dit mer alvast oppe klender.

Veur wie laat en zoeë mójtj gae 't Kontaktblad etc. inne gate haoje)


| | | |
|-----------|-----------|---|
| Zaoterdig | 21 jan. : | Receptie noewe Prins Moerebuuk |
| Dinsdig | 31 jan. : | Oefene Bóntje Aovendj |
| Dónderdig | 2 feb. : | Oefene Bóntje Aovendj |
| Zunjig | 5 feb. : | Kaartverkoup Bóntje Aovend |
| Zunjig | 5 feb. : | Seniorenmiddig |
| Maondjig | 6 feb. : | Oefene Bóntje Aovendj |
| Dinsdig | 7 feb. : | Oefene Bóntje Aovendj |
| Dónderdig | 9 feb. : | Generale repetitie Bóntje Aovendj |
| Vriedig | 10 feb. : | Bóntje Aovendj |
| Zaoterdig | 11 feb. : | Bóntje Aovendj |
| Zunjig | 12 feb. : | Bóntje Aovendj |
| Zunjig | 19 feb. : | Heilige Mès, Brunch en Jubileumreceptie |
| Zaoterdig | 25 feb. : | Sleuteleuverdracht in Èil |
| Zunjig | 26 feb. : | Vastelaovendj zunjig |
| Maondjig | 27 feb. : | Vastelaovendj maondjig = OPTOCHT ! |
| Dinsdig | 28 feb. : | Vastelaovendj dinsdig = KINJEROPTOCHT en ... sloete ! |



Alvast veul plezeer!

As se kals euver waers.

Wil en Door ginge op verkansie in Turkije óndanks det ze allebei neet zoeë haoje van sierpe zón en ze mèt Turke neet zoeë good kinne opsjete. Op 't vlegveldj in Turkije aangekómme kreeg Wil te huëre det op bandj 1 de koffers aaf te hole wore. Dus ginge ze bie bandj 1 staon. Nao ein kwarteer nog gein koffer. Nao ein half oor nog steeds gein koffer. Mer óngertósse dreidje op bandj 2 ein koffer al ein tiedje einzaam get rundjes. Wil waas 't meug, ging verhaol hole ane balie en eisdje ónmiddeliek zien koffer. Hae kreeg te huëre det zien koffer op bandj 2 laag. Det haaj Wil waal gezeen mer hum waas vertèldj det 't koffer op bandj 1 aaf te hole waas dus woeëj d'r 'm ouch dao aafhole!
Jeh ... waat mós se dao op zègge?



Dae wètj wie 't mójt.

Angelique van Ard van Roy geit mèt de hóndj wanjele as Ard mójt wirke. Angelique numtj zich de tied en buurtj mèt ederein dae ze tege kumtj. De hóndj heet neet zoeëveul gedóldj en as 't hum te lang doortj pistj tjer Angelique euver de sjoon as teiken det 'r verder wiltj.



advertentie

Zeuktj gae ein struukske, ein buimke of ein plentje veur inne tuin of achter de lamelle



Den mójtj gae zeker ins bie
Linders aanbelle

Kinjer

Rick van Paul vanne Sjilder kwaam te laat thoes veur 't aete. Zeet Femke vanne witte, tante Paul bès se noe boos? 'Jao,' zeet Paul. Zeet Femke, 'as mamma boos is op mich den mójt ich oppe gank, mer as mamma boos is op pappa zeet ze; ich gaon verhoetze!'



advertentie

Vrachtwages blinke
weer nao ein
bezeukske
aan;



TANK & TRUCK
CLEANING WEERT



1e pries euver alles (wisselbeker)
en ouch
1e pries wages
mèt 73,0 puntje.
"Mèt dees daag kriegtj de kater ós ..."
Van; De Brandjblussers



2e pries mèt 67,5 puntje : "As Arabiere in dees oase"
van ; De Prutsers
3e pries mèt 64,0 puntje : "Blauw" van ; V.K. die vief

Oetsleeg Vastelaovesoptocht 2005 van CV De Moerebuuk

1e pries klein groepe
mèt 63,5 puntje.
"De prins lieëtj ós inne steek"
Van; Blue Band



2e pries mèt 62,0 puntje : "Höbdj gae ós Toosje al
gezeen" van ; Ruud Heijkers
3e pries mèt 59,5 puntje : "Moeërevangers van Èll"
van ; De Moeërevangers



1e pries groeëte groepe
mèt 66,0 puntje.
"Vastelaovendj, wereldj van ..."
Van ; 7 Groeëte en ein piep



2e pries mèt 64,5 puntje : "Wae drage ós steinke bie" van ; buurt Pannestert
3e pries mèt 62,0 puntje : "Èlls Angels tege The A-team" van ; Èlls Angels



1e pries alleingangers
mèt 61,5 puntje
"Ein deur kado"
door Hub Willekens

2e pries mèt 61,5 puntje : "Gein keus" door Jos Janssen
3e pries mèt 61,5 puntje : "Lord of the strings" door Jac Teuwen

Ellske

Kritisch, sjerp en oplèttendj. Det is Ellske. Dees aoj tante duid op heur eige meneer verslaag van waat ze zoeë-al hiej inne buurt heet gezeen of heet gehuërdj.



Trimbaan veur aojere in verzörgingstehoes Wieërt.

In Wieërt bie Stichting Land van Horne hōbbe ze veur de aoj minse 'n trimbaan gemaaktj inne hoop det ze get mieër gaon bewege. De officiële naam veur de baan is "Life Trail". In Hunsel hōbbe ze gedachtj "det kinne wae baeter" en hōbbe ze achter 't bejaardehoes 'n heuse golfbaan aangelagjt óm daomèt de sociale kóntakte ónger de bewoeëners get op te veizele, want inne winkels dao kan det neet mieër.

Ouch in Tungelder geine pestoeër mieër.

De pestoeër van Tungelder heet aafsjeid genómme en wie Ellske heet gehuërdj kumtjt d'r geine vervanger veur mer geit eine angere pestoeër oet de regio dao vervange. De naam vanne vervanger waas bie 't ter perse gaon van dit blaedje nog neet bekindj gemaaktj, mer meugelijk numtjt óze pestoeër Mols Tungelder d'r ouch bie. Hae dinktjt det dit den ouch mèttèldj veur zien pensioen (aafgekeke van Truijen dae d'r óm die reje Heitse heet bie gepaktjt ...).

Exaten, Hornerveld of Leudal.

De raodsleje van Haele, Roggel, Naer, Hunsel en Heitse hōbbe nao get gehakketak (binne heur eige gelejere numdje 't emes "brōddelwerk") toch oeteindelik veur de noewe gemeindjenaam "Leudal" gekoze. Veur Hunsel liktjt deze naam nogal geveulig, want zoeë-as djer wètjt liktjt de gemeindje Hunsel as innigste boete dit gebied. Mer blikbaar haaj gein van de 12 Hunselse raodsleje hie ein probleem mèt en stumdje ze allemaol veur (waat trouwes binnen heur eige raodsvergaderinge noeëts veur kumtjt). Ellske dinktjt det de toeën veur de toekomst daomèt gezatte is, det dōrpe vanne huidige gemeindje Hunsel inne toekomst ouch hieëlemaol niks mieër in te bringe hōbbe en wae euvergelaote zeen ane heersers in Heitse. Mer vanne angere kantj zeen wae den ouch beveurrechtjt want aan 't hoofd van die heersers steit den ózze huidige bōrgervader, de hieër Truijen.

De Mooshoofpaadzengers zeen trōk van wèggewaestjt.

Twieë jaor geleje haje ze beslote óm ein puntj te zètte achter heur jaorliks optraeje bie de bōntje aovendje vanne Zoatmale in Rooy. Aafgeloupe januari veel 't dook defenitief en ouchwaal zeer emotioneel mèt heur lèste leedje "Mien testament" van Boudewijn de Groeëte. Veul traone roldje euver de wange bie veul fans en ouch bie de zengers zelf. Mer blikbaar hōnge d'r ein aantal leje vanne Mooshoofpaadzengers heur vrouwluuj get te zieër oppe lup. Missjien daoróm de "return" en hōbbe ze de draod weer opgepaktjt. 'T vèltjt Ellske op det nao de trōkkieër vanne Classics "Classics Revival", noe de beurt is ane "Mooshoofpaadzengers Revival". En weem wètjt, missjien inne toekomst ouch nog de trōkkieër van Mary Servaas. "Zangeres Zónger Naam Revival" inne vorm van eine geist oet de fles.

Erme paol inne wintjer.

Steis se dao allein in waer en windj. ane kantj vanne meanderendje beek, in ein kaal en drassige wei. De gemeindje heet dich ein bienao neet mieër te laeze besloet veur de kop gehange. Det geit euver brandjgevaor bie erge druëgdje (!). Haje ze dich neet baeter ein vogelhōkske oppe kop kinne zètte? Dao wore veugel missjien wintjer en zomer blie mèt gewaesjt.



Bouwe

Ellske heet oet good ingeligdje bronne gehuërdj det medio dit jaor achter de zaal de sjōp inne grōndj geit. Ze is al 'n paar jārkes aod en wètjt zich te herinnere det dit al dèkker is beloofdjt. Steeds bleke d'r weer foute gemaaktjt te zeen, van stankcirkels tot geluidscirkels en grōndj aankoupe, det ze zich waal dèkker aafvroog; "weite die waal woeëdet ze met bezig zeen?" Ellske is den ouch bang det de fundering ónger dees belofte net zoeë zwaak is as de fundering die ze ónger 't brōkske vanne fietsepaad van Neeritter nao Rooy haje gemaaktjt.

Dominoday

Ellske waas ouch stóm verbaastjt toen ze huërdje det hieël Nederland op ziene kop stong ómdet eine jager vanwege eine houp dominostein ein hoeskets haaj nieërgesjote. Hae deej det óm te veurkómme det die mōs ein wereldjrecord ging zette mèt dominosteinkes ómgoeëje, in plaats van det de organisatie de start zoj inleie. Missjien kinne ze dae jager ouch vraoge óm in Wieërt de bosuul aaf te sjete, want dae is toch al gein lang laeve mieër besjore.





Winnaar vanne Sparcup mèt de kinjeroptocht 2005:

"Mèt Theo as prins make wae van edere Ell's Angel ein normaal mins"

door de Ell's Angels

Wisj djer al ...

- det Leike aan May van Lowieke vroog of ze neet bang waas det ze mèt heur nepnegels door 't tuuskespepeer zoj sjet
- det Lowieke innegang zagt "ich hõb gein negels en ich sjeet d'r ouch doorhaer!"
- det Marlies eine noew vriendin mèt vrinjd heet
- det die heur ein noew cadeau hõbbe gegaeve
- det det veur Paul ouch ein verassing waas
- det 't cadeau blaftj en Kuil hètj
- det ze dus op ein gegaeve moment twieë hunj haje
- det vanne damesgymclub gein noets te meldje vèltj
- det 't d'r sjenbaar zoeë-as altied röstig aan toe geit
- det bie Frans en Paul vanne Sjilder eine sjoëne hõndj waas aangeloupe
- det det noe net eine hõndj waas dae Frans altied haaj wille hõbbe
- det t'r hum daorõm gaer haaj gehaoje mer
- det det neet doorging want dae hõndj ziene baas woeëntj inne pastorie en kwaam hum hole
- det eine bewoeëner aan de Breeven zien buxushèk woeëj deklarere bie de gemeindje
- det die hèk zoeëgenaamdj haaj geleje van 't zaot struije inne wintjer
- det dae mins bot gevange heet want de gemeindje trapdje dao neet in



Krapaan.

Krapaan deej mèt ane leedjesaovendj. Ze wore same nao Wieërt gewaestj veur get sjoëns te koupe veur aan te doon. Bie de Wibra vónje ze sjoëne hesjes en neet te deur. Nao 't aafraekene ginge de hesjes in ein sjoëne plastic tas vanne Wibra. "Weem dreugtj noe die tas?". Nemes woeëj dao mèt loupe. Weem ze noe oeteindelik gedrage heet weite wae neet, mer 't wore waal sjoëne hesjes.



advertentie


VEUR ALLE VERZEKERINGEN




NAO
LEON KNAPEN

OUCH VEUR
EURE HYPOTHEEK

Elltaria



gewuën de lekkerste friet en snacks
ouch veur compleëte sjõttels



Ein plank hie en
ein letje dao.
Laotj aanein
tummere euver aan

Wim Steuten
Tummerwirke

Kinjer



Bie len waas op ein gegaeve moment ein verstenjig gesprek ane gang

tösse twieë kinjer van óngevieër 4 jaor. "Oos mam is nao 't zekehoes veur ein spiraaltje" zagt ein van die snake. Zeet det anger kintj; "Oos mam wiltj ouch gein kinjer mieër ..!"



advertentie

Veur ein plentje veur inne mooshoof of ein bleumke oppe tied.

Nao Verhaag haer is neet wiet.



Weurdje vanne redakvie

Weer waas 't gein probleem óm ózze Kwakel vol te kriege. Dao zeen weer get noew dinger geprobeertj en óntdèktj die wae uch neet hõbbe wille ónthaoje. Mer 't belangriekste: net as eder jaor waas eure inbring geweldjig. Blijftj zoeë doorgaon, gae verdeentj allemaol de ieerste pries!

De Kwakel is ein oetgave van 't Kwakelcomité;

Thea van Beurskes, Jeanny vanne Koalder, Corry van Pleunis, Hub vanne Baars en Paul van Miet

Vormgaeving;

Huub van Sentjens en Paul van Miet





PROKLAMATIE VAN JEUGDPRINS MITCH EN JEUGDPRINSES JOLIEN

Ich prins Mitch,
Zoon van Wilfred van Coen vanne Lange
en Drina van Stoutemusber
en van Lindi van Riet vanne Pans
en van Jan van Geraad van Spiea vanne Bakhei.



Ich prinses Jolien,
Dochter van Henk van Brunester Sjeng
en Noenster Leen
en van Annelies van Sjeng van Coolen Pierre
en van Mia van Neule Sjef.

Ich woeën in 't Spargelheukske mèt mien Pap en Mam,
zöster Kelly en breurke Justin.

Ich woeën oppe Antoniusstraat same met ós pap, mam,
mien breurke Remko en mien zösterke Kristel.



Voetballe is mien löst en mien laeve,
dao kin ich mich hieëlemaal aan gaeve.
Mèt mien vader as trainer daobie,
gaeve wae inne D1 good vanne pa ...

Ich volleybal inne maedjes C van Bach SV in Èll,
det doon ich gaer vrieët snel.
Wae beginne ózze wedstried mèt sjrieëwe,
det numme wae eine jell
En daonao zeen wae fanetiek bezig
mèt 't volleybalspel.



Ouch vinj ich tennisse ein leuke sport,
daoróm kóm ich dèk tied tekort.
Mesjien det ich Sjeng Schalken nog ins oetdaag,
mer zeker neet mèt dees carnavalsdaag.



Oppe tennisbaan wil ich mich ouch gaer meug make,
door de bel hel en good te rake.
Mesjien det ich Mitch nog ins kan verslaon,
mer den hób ich toch nog get tied te gaon.

In dit 5x11 jubileumjaor, staon wae prins Mitch en prinses Jolien veur uch klaar.
Wae zeen zeker in ózze sas, mèt ós adjudante Esther en Cas.
Sporte zitj ós in 't blood, mer gae zultj zeen, vasteloavendj vere kinne wae ouch hieël good.
Mèt ós motto:

Mèt 't racket óm ózze nek, doon wae dees daag good gek!




Ein fieëst

Normaal gesproke organisere de vastelaovesmedewirkers eder jaor ein fieëst veur zichzelf. Veur de gelegenheid van 't 55-jaorig jubileumfieëst waardje dit fieëst gecombineerdj mèt de leedjesaovendj. Det vónj nemes ein bezwaor want 't aangeboje aete en drinke smook good en det waas 't belangriekste. Dae leedjesaovendj dae d'r aangeplektj waas is óngertösse legendarisch. 'T gebeure waardje verdeiltj euver allebei de cafés. Mer leefst 12 leedjes, ein echte jury, ein heus scorebord en hieël veul publiek deje mèt, logisch det zoeë-eine aovendj slaagtj. "Dit mótte wae dèkker doon," waas de algemeine indrök. Dus volgendj jaor weer ... ein fieëst?



advertentie

Hóbtj gae last van eur spiere inne bein of nek. Den is Beekman-Verleg de juuste plek.



En 't winnendje leedje is



Vastelaovesblood

(Componist/tekst: Jeugdcomité
Muzikale bewirking: Fer Koolen)

Refrein

Veuldj gae det ouch die kriebels in eur bein
Mèt vastelaovendj hiej in Èll
Den veul ich mich zoeë fijn
Cafeeke in, cafeeke oet den hób ich goje mood
En huër ich dae meziek d'r bie
Krieg ich confetti in mien blood

Zoeë veuraan in november
Den kumtj den toch dae tied
Den krieg ich weer de kriebels
Bèn michzelf effe kwiet
Mer weurtj 't jannewari
Dan briktj 't toch weer los
En is mien erm blood
Toch echt hieël good de klos.

Refrein

Op maandjig mèt de optocht
Hieël Èll is oppe bein
Gaon same lekker stappe
Det vinje wae zoeë fijn
Alle moeërebuuk die hóbbe den veul lol
En mèt confetti in ós blood
Gaon wae flink oet ózze bol.

Refrein



advertentie

Hub van Luute Tenieëltechniek

ouch al steit met dees daag alles oppe kop
miene service stiet altied veurop !!!

Aswoonsdig hieëring happe
Bie Siem of bie Marlies
Dien lèste pilske pakke
Det is ós advies
Óm ein oor of drie
Den is 't echt gedaon
Det is de hoeëgste tieëd
Om nao hoese te gaon

Veuldje gae det ouch?
Die kriebels in eur bein?
'T waas vastelaovendj hie in Èll
Wae veuldje ós zoeë fijn
Cafeeke in, cafeeke oet
Wae haje goje mood
En noe is det geveul veurbie
Veur ein jaor weer gewuën blood
Refrein



IN 'T VASTELAOVENDIG IN 'T MOEËRELANDIG

www.moerebuuk.nl

Cóntract

Hie 't cóntract van Fer mèt Jesper Kessels det Fer bedoeldje in ziene toespraak wie det t'r net tot 55e prins van De Moerebuuk waas oetgerope. 'T is al euveringekómme in mieërt 2003 en Fer is vast van plan óm d'r Jesper aan te haoje. Det mó't toch gein probleem zeen tösse twieë muziekmanne!

Kinjer.

Fer waas nog mer net oetgerope tot prins van De Moerebuuk wie ziene zoon Max aan hum vreugtj; "pap, mèt welke loterie hób se det noe weer gewónne?"



CV DE MOEREBUUK ÈLL

De Kwakel - jaorgank 41
Jannewari 2006

De Kwakel is ein oetgave van 't Kwakelcomité



"03-03-03

Ich, Jesper Kessels, verklaor bie deze det ich zal zörge veur muziek, vanaaf nao d'n optocht tot sloetingstied, op vastelaovesmaandig, as Fer van Linje prins is"